

VENDIM
Nr. 350 , datë 13.5.2026

**PËR DISA NDRYSHIME DHE SHTESA NË VENDIMIN NR. 570, DATË 17.7.2019,
TË KËSHILLIT TË MINISTRAVE, “PËR KRIJIMIN, ORGANIZIMIN DHE
FUNKSIONIMIN E AGJENCISË KOMBËTARE TË PYJEVE”, TË NDRYSHUAR**

Në mbështetje të nenit 100 të Kushtetutës dhe të nenit 6, të ligjit nr. 90/2012, “Për organizimin dhe funksionimin e administratës shtetërore”, me propozimin e ministrit të Mjedisit, Këshilli i Ministrave

VENDOSI:

Në vendimin nr. 570, datë 17.7.2019, të Këshillit të Ministrave, “Për krijimin, organizimin dhe funksionimin e Agjencisë Kombëtare të Pyjeve”, të ndryshuar, bëhen këto ndryshime dhe shtesa:

1. Kudo në përmbajtje të vendimit, emërtesa “Ministria e Turizmit dhe Mjedisit” zëvendësohet me fjalët “ministria përgjegjëse për pyjet”.

2. Në kreun III bëhen shtesa dhe ndryshimi, si më poshtë vijon:

a) Pas pikës 5.1 shtohet pika 5.1/1, me këtë përmbajtje:

“5.1/1. Në lidhje me angazhimet e Republikës së Shqipërisë në procesin e integritetit në Bashkimin Evropian:

a) kontribuon në përafrimin dhe zbatimin e legjislacionit të Bashkimit Evropian në fushën e pyjeve, të biodiversitetit e të ujërave;

b) kryen inventarizimin, monitorimin dhe raportimin e gjendjes së pyjeve, sipas standardeve të Bashkimit Evropian;

c) kontribuon në politikat për ndryshimet klimatike dhe mbrojtjen e biodiversitetit nëpërmjet menaxhimit të qëndrueshëm të pyjeve;

ç) kontribuon për përfitimin nga programet dhe fondet e Bashkimit Evropian, si dhe nxit përdorimin e teknologjive moderne në sektorin pyjor.”.

b) Pika 7 ndryshohet, si më poshtë vijon:

“7. Emërimi i drejtorit të Përgjithshëm të Agjencisë Kombëtare të Pyjeve bëhet me vendim të Këshillit të Ministrave dhe marrëdhëniet e punës në këtë pozicion rregullohen sipas dispozitave të ligjit nr. 7961, datë 12.7.1995, “Kodi i Punës i Republikës së Shqipërisë”, të ndryshuar. Marrëdhëniet e punës së punonjësve të AKP-së dhe të agjencive rajonale të saj rregullohen sipas dispozitave të legjislacionit të shërbimit civil.

Marrëdhëniet e punës së punonjësve administrativë rregullohen sipas dispozitave të Kodit të Punës.”.

Ky vendim hyn në fuqi pas botimit në Fletoren Zyrtare.

KRYEMINISTËR
Edi Rama